



Publicaziuns dalla vischnaunca, jamna 39

Votaziuns federalas, votaziun cantunala e votaziun regiunala

L'urna principala en casa communal ei aviarta sco suonda:

Sonda, 27-9-2014, 18.30–19.30
Dumengia, 28-9-2014, 9.00–11.00

La documentaziun da votar duess mintga votant(a) haver obteniu. Cass cuntrari san ins s'annunziar immediatamein, denton *sil pli tard entochen venderdis, ils 26 da settember 2014, allas 17.00* tier l'administraziun communal (tel. 081 920 36 36).

Levgiament da votar

Mintga votant(a) ha la pussevliadad da dar giu sia vusch a scret. En gliez mument sto el/ella observar il suadont:

1. Emplenir ora ils cedels da votar e metter quels en la cuviarta da votar e serrar giu ella.
2. Metter la cuviarta da votar ensemen cun il certificat dil dretg da votar suttascret en la cuviarta, cun la quala Vus haveis obteniu la documentaziun da votaziun.
3. La cuviarta ch'ei adressada all'administraziun communal saveis Vus tarmetter cun posta (*supplicau da francar*) ni directamein fierer en la scaffa da brevs dalla casa communal.

Ils cedels da votar ston esser sil pli tard la sonda, ils 27 da settember 2014 allas 12.00 tier l'administraziun communal.

Il certificat dil dretg da votar ei da suttascriber. **Senza Vossa suttascripziun cun agen maun ei la votaziun nunvaleivla.**

Suprastonza communal Disentis/Mustér

Damonda da baghegiar

2014-1040.000

Datum dalla publicaziun: 26 da settember 2014

Il patrun: Claustra Mustér Via Claustra 1, 7180 Disentis/Mustér

Il representant: Claustra Mustér Via Claustra 1, 7180 Disentis/Mustér

Object: Tschentar in palancau per segirar la fatschada dalla baselgia claustrala, parcel-
la 580, Via Claustra 1, 7180 Disentis/Mustér

- Ils plans da construcziun ein deponi tier l'administraziun communal.
- L'investa publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 23 da settember 2014

Uffeci da baghegiar Disentis/Mustér



Annunzias da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziau suandont project:

Nr. 2014 – 2084.000

Cuminonza da proprietaris en condomini, parcella 704, Via Lucmagn 8, 7180 Disentis/Mustér; endrizzar in stabiliment fotovoltaic sin tetg dils baghetgs sin parcella 704, Via Lucmagn 8, 7180 Disentis/Mustér. Encunter quella decisiun san ins protestar a scret enteifer 20 dis dapi la publicaziun alla suprastanza communal.

Disentis/Mustér, ils 22 da settember 2014

Uffeci da baghegiar Disentis/Mustér

Lubientscha da baghegiar

L'istanza da baghegiar ha concediu suandonta lubientscha da baghegiar:

Nr. 2014-1038.000

Societad da baghegiar Center dil Vitg, Via da scola 18, 7180 Disentis/Mustér; spazzar il baghetg nr. 82 sin parcella 710 ed ils baghetgs nr. 78 e nr. 78-A sin parcella 719, construir ina casa da fatschenta e da habitar sin la parcella nova 3855, Via Lucmagn 7, 7180 Disentis/Mustér.

Disentis/Mustér, ils 23 da settember 2014

Uffeci da baghegiar Disentis/Mustér

Purschida gratuita

La vischnaunca da Mustér porscha era uonn a ses habitonts la pusseivladad da visitar gratuita-mein la Casa da traffic a Lucerna, www.verkehrshaus.ch. Al spurtegl dall'administraziun communal sa per *mintga di* digl onn vegnir retratg *5 entradas gratuitas*. En quella purschida ei cunteniu:

- entrada gratuita ella Casa da traffic a Lucerna cun museum, planetarium, museum da Hans Erni
- teater da film Imax per in prezi reduciu
- 10% rabat sin biars artechels ella stizun dil museum

Co fuss ei da far inagada in'excursiun a Lucerna, forsa gest cun nezegiar la carta dil di per viagiare cun quasi tut ils mieds da traffic publics en Svizra? Dapli informaziuns retscheveis Vus tier l'administraziun communal Mustér (tel. 081 920 36 36 ni e-mail: admin@disentis.ch).

Administraziun communal



Lavurs da notg RhB

Sutpassadi RhB Chischliun–Scaletta

Naven da **gliendisdis, ils 15 da settember 2014** entochen **dumengia, ils 5 d'october 2014** vegnan las lavurs per il sutpassadi dalla Viafier retica a Chischliun/Scaletta realisadas. Ord motivs da traffic (lavurs egl intschess dils binaris) vegn luvrau duront la notg naven da ca. las 22.00 entochen allas 5.30.

La notg dils 4 sin ils 5 d'october cuozan las lavurs naven dallas 18.00 entochen allas 7.00. Per quei temps ei endrizzau in bus per ils trens che san buca cursar.

Nus sespruein da reducir las immissiuns da canera sin in minimun ed engraziein allas vischinas ed als vischins per lur capientscha.

Damondas en caussa sclarescha bugen la survegionza da baghegiar, biro d'inschignier, Iso Mazzetta, (tel. 081 943 17 22).

Disentis/Mustér, ils 10 da settember 2014
Biro d'inschignier Iso Mazzetta

Surdada burgheis d'honor

Invitaziun

La vischnaunca da Mustér ha il plascher d'undrar monsignur avat Vigeli Monn cul dretg da burgheis d'honor.

La festividad da honoraziun ha liug *dumengia, ils 28 da settember 2014 allas 10.30* en halla Cons. *Il program sepresenta sco suonda:*

- Beinvegni entras il president communal
- Producciuns musicalas entras la Societad da musica Mustér
- Undraziun entras Simon Camartin e surdada dil document
- Aperitiv

In e scadin ei envidaus a quella festividad e nus selegrein da Vossa preschientscha.

Suprastonza communal

Taxa da cumpensaziun da pumpiers 2014

Tenor art. 12 dalla lescha da pumpiers dalla vischnaunca da Mustér ein students ed emprendists deliberai dil survetsch activ da pumpiers sco era dalla taxa da cumpensaziun.

Nus fagein attents tut ils *students ed emprendists sur 20 onns* d'inoltrar a scret ina confirmaziun actuala dalla scola ni digl emprendissadi. Il mussament ei da tarmetter entochen sil pli tard *vendredis, ils 10 d'october 2014* all'administraziun communal, caum postal 57, 7180 Disentis/Mustér ni per e-mail (rschmed@disentis.ch). Mo cun ina confirmaziun a scret sa la deliberaziun vegnir risguardada.

Gia ordavon grond engraziament per las breigias.
Administraziun communal



Cussegl da vischnaunca Meglieraziun generala e lescha da turissem

Il cussegl da vischnaunca ha sut il tgamun da Flavio Murer tractau ils 19 da settember 2014 differents fatschentas, en special la meglieraziun generala da Mustér e la lescha da turissem.

Meglieraziun generala

A caschun dalla votaziun all'urna dils 11 da mars 2012 ha il pievel decidiu d'instradar la meglieraziun generala per la vischnaunca da Mustér cun risguardar la situaziun da Segnas e da Pardomat. En connex culla fixaziun dil territori cumpigliau ed en special tier l'elaboraziun dalla reit da vias entras la cumissiun da meglieraziun eisi semussau ch'igl ei necessari ed indicau dad era integrar il territori dallas meglieraziuns da Segnas e da Pardomat, ch'ei vegnidas menadas atras gia ils onns 50, cumpleinamein el project dalla meglieraziun generala dalla vischnaunca da Mustér. Ston las vias dallas meglieraziuns da Segnas e da Pardomat vegnir sanadas senza ch'il territori vegni integraus cumpleinamein ella meglieraziun generala, vegn quintau cun subvenziuns davart dalla Confederaziun e dil Cantun da rodund 65%. Ein ils territoris da quellas duas meglieraziuns integrai cumpleinamein el project general, muntan las subvenziuns el minimum 80%. Ton ils vischins da Segnas sco era ils representants dalla meglieraziun a Pardomat ein vegni informai pertgei che quellas duas meglieraziuns duein vegnir integradas. Il territori cumpigliau ensiara niev ina surfatscha da ca. 1100 ha. Il diember dallas parcelas pertuccadas munta 1880. La reit da vias che vegnan sanadas ni baghegiadas da niev semida buca entras l'integraziun da quellas duas meglieraziuns. L'integraziun cumpleina da Segnas e Pardomat caschuna mudests cuosts supplementars, aschi ch'il credit da rama concedius tonscha. Il cussegl da vischnaunca ha approbau unanimamein l'integraziun cumpleina dallas meglieraziuns da Segnas e da Pardomat ella meglieraziun generala dalla vischnaunca da Mustér e da suttametter quei conclus alla decisiun entras la cuminonza dils votants.

Lescha davart la taxa da hosps e la taxa da turissem

La lescha actuala davart la taxa da cura e la taxa per promover il turissem datescha digl onn 1998. Sin fundament da quella lescha incassescha la vischnaunca da Mustér ina taxa da cura ed ina taxa per promover il turissem. Las experien tschas muossan che l'execuziun dalla lescha vertenta ei fetg greva e cumbinada cun gronda lavur, en special quei che pertucca la taxa da cura. Suentier ch'il pievel dil Grischun ha renviu la lescha che prevedeva l'introducziun d'ina taxa turistica cantunala han las suprastonzas communalas da Tujetsch e Mustér sco era Sedrun Mustér Turissem per quei motiv decidiu d'instradar ina revisiun dallas leschas communalas cun la finamira da simplificar igl incasso, evitar maldiever e recaltgar entradas supplementaras. Per preparar la fatschenta ha il cussegl da vischnaunca eligiu ina cumissiun predeliberonta cun mintgamai sis commembers da Mustér e Tujetsch. La cumissiun representa ils divers interess turistics sco era ils purtaders da prestaziuns.

La lescha davart la taxa da hosps e la taxa da turissem preveda dapertut nua ch'igl ei pusseivel pauschalas per simplificar il rendaquen e cheutras cunzun promover hotels ed alloschaders professiunals. Cun ina pli aulta occupaziun sereduceschan las contribuziuns debitadas. Per ils proprietaris, gudiders ni affittaders permanents da habitaziuns da vacanzas vegn quintau ina pauschala obligatoria sin basa dalla surfatscha da habitar en meters quadrats. Pil mistregn ed ils ulteriurs menaschis vegn pretendiu ina taxa da turissem tenor la summa d'AVS. Las vischnauncas organisadas en Surselva Turissem han medemamein elaborau ina lescha da turissem tenor il model Flem/Laax/Falera.

Las finamiras dalla nova lescha davart la taxa da hosps e la taxa da turissem ein da rinforzar persistentamein e garantir la posiziun da concorrenza dalla destinaziun Mustér Sedrun Turissem. Plinavon duei vegnir realisau ina finanziaziun che possibilitescha il svilup da projects turistics. Cun la nova lescha da turissem san ins generar comunablamein surpli entradas da rodund frs. 400 000.–.



Il cussegl da vischnaunca e la suprastonza communal ha perschadi da saver suttametter ina proposta cu ina finanziaziun equilibrada. Igl augment dallas tariffas ei responsabels ed il maun public contribuescha vinavon considerabels mieds generals da taglia per il turissem. Il cussegl da vischnaunca ha approbau unanimamein la lescha ed il regulativ davart la taxa da hosps e la taxa da turissem. La lescha davart la taxa da hosps e la taxa da turissem vegn el senn d'art. 21, lit. b dalla constituziun communal suttamess al referendum facultativ.

Maschina per il menaschi tecnic

Il basegns per il remplazzament dall'actuala maschina per il menaschi tecnic ei incontestabels e necessaris. L'evaluaziun dalla maschina per il menaschi tecnic ei succedida tenor differents criteris, sco p.ex. prestaziun dil motor, «on board diagnostik», tracziun da quater rodas permanent ni tenor basegns, plemas hidraulicas, ladezia dil vehichel, capaciad da cargar, prestaziuns da servis. Suenter ina animada discussiun ha il cussegl da vischnaunca concediu unanimamein in credit da frs. 165 000.– per la cumpra d'ina maschina «Meili» per il menaschi tecnic.

L'interpellaziun da cusseglier Wendelin Jacomet davart la meglieraziun funsila egl intschesch dalla vischnaunca Mustér ei vegnida rispundida.

Suprastonza communal

Referendum facultativ

A caschun da sia seduta dils 19 da settember 2014 ha il cussegl da vischnaunca approbau la lescha davart la taxa da hosps e la taxa da turissem. Quella lescha remplazza la lescha davart la taxa da cura e la taxa per promover il turissem digl onn 1998.

Conform ad art. 21, lit. b dalla constituziun communal ei quella decisiun suttamessa al referendum facultativ. Il messadi e la lescha davart la taxa da hosps e la taxa da turissem ei exponius per investa en casa communal (stanza nr. 10).

Sin proposta da silmeins 80 votants exista la pusseivladad d'inoltrar enviers sura conclus il referendum enteifer 20 dis dapi la publicaziun officiala.

Suprastonza communal

Via da comunicaziun Pardomat

Las lavurs da construcziun dall'emprema etappa prospereschon.

Venderdis, ils **3 d'october 2014** naven dallas 17.00 vegn la via puspei aviarta per scadin traffic.

Duront la jamna dils **6 entochen ils 10 d'october** vegn il numnau tschancun catramaus. Ord quei motiv resta la via serrada mintgamai naven dallas 7.00 entochen allas 17.00.

En cass da malaura vegn la lavur da catram spustada per ina jamna.

*Uffeci da construcziun bassa dil Grischun
Pius Cavegn*



Rimnada da pupi

Venderdis, ils 3 d'october 2014

Adatg! Ei vegn mo rimnau: gasettas, illustradas, catalogs, cudischs e prospectes stampai

Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziel.

Nus rimnein buca cartun. Quel sa vegnir deponius a Raveras igl entir onn ora e quei las mesjamas (16.00– 17.30) e sondas (10.00–12.00) e buca durant la rimnada.

Bien engraziament per Vies agid e sustegn!
Scolas Mustér, Ch. Berger

Apparats d'udida

Gliendisdis, ils 29 da settember 2014 saveis Vus schar schubergiar e regular Vies apparat d'udida naven dallas 14.00–16.00 el Puntreis, Center da sanadad a Mustér, Via Cons 11.

L'uniun Pro Audito Cuera, cun signur Arthur Jacomet fa quei survetsch per tuts interessents gratuitamein.

Cordiala invitaziun
Puntreis, Center da sanadad

Corporaziun manteniment da vias Mompé Medel

Invit

Radunonza generala dalla corporaziun manteniment da vias venderdis, ils 3 d'october 2014 allas 20 15 el local dall'Uniun da scursalar Mompé Medel.

Tractandas:

1. Elecziun d'in dumbravuschs
2. Protocol
3. Rapport dil president
4. Rendaquen per 2013
5. Rapport dils revisurs ed approbaziun dil quen
6. Varia

Cordialmein envida
la suprastonza

Fiera da resti d'affons a Mustér

Venderdis, ils 26-9-2014 allas 19.00–21.00.
sonda, ils 27-9-2014 allas 9.00–10.30.

Mummas cun affons pigns



3. Zavrada da nuorsas

Il 27 da settember 2014 a Salaplauna

Program:

10.00	scargada da Faltscharidas a Salaplauna
10.00–16.00	fiera, ustria, luvratoris da filar, fletrar, tombola, program d'affons ...
10.30	engraziament dad avat Vigeli
11.00 e 14.00	tunder nuorsas
13.00	percuors da nuorsas cun Andi Schiess ch'ei staus quater gadas campjun svizzer cun ses tgauns
14.30	premiaziun dalla tombola

Nus fagein in cordial beinvegni alla 3. Zavrada da nuorsas a Salaplauna. Ils purs dall'alp Lumpegna ed il Center sursilvan d'agricultura. Dapli informaziuns:

www.agricultura.ch

Uniun samaritana Mustér

Cuors: Agid d'urgenza tier affons pigns (Notfälle bei Kleinkindern)

Sonda, ils 18 d'october 2014, 8.00–12.00/14.00–18.00, casa da scola, Mustér.

Il cuors sedrezza a mummas e babs, tattas e tats ed a tut las persunas che han da far cun affons pli pigns ed era pli gronds. Ulteriur sclariment ed annunziat entochen: ils 8 d'october 2014 tier: Yvonne Flepp, tel. 081 947 50 35, yvonne.flepp@kns.ch

Uniun da harmonicas Cadi

La fiasta entscheiva.

Sonda, ils 4 d'october 2014 allas 20.00 concertescha la formaziun «Regionales Akkordeonorchester Peter Frey Reinach» en baselgia parochiala s. Gions.

Els portan a nus ils salids dalla regiun Svizra dal nordvest, la quala ha renunziat da lur dretg d'organisaziun dalla fiasta federala per in'emprema organisaziun d'ina tala fiasta d'accordeon en tiara romontscha. Beneventei nos amitgs da Reinach cun Vossa preschientscha.

Il CO 17.

Fiasta federala d'accordeon 2016 a Disentis/Mustér

Unihockey Desertina Kids

Cordialmein envidein ils affons dallas annadas 2003–2007 per ils trenaments d'unihoc.

Ils pli pigns giugadurs emprendan ils emprems trics e reglas sil plaz d'unihoc. Bugen s'entupein l'emprema gada cun vus mesjamna, igl 1. d'october 2014 el center da sport a Mustér.

Temps: 18.00–19.30, cuosts frs. 50.– per sesiun.

Sin bien seveser

UHC Desertina Bulls, Ronny Zanin